



## Սիւսանթոն

Ափ մը մոխիր՝ Հայրենի տուն

ԱԿՆԱՅ ՅԻՇԱՏԱԿԻՆ

Ա

Աւա՛ղ, ապարանքի մը պէս մեծ էիր եւ շքեղ,  
Ու ես երդիքներուդ սպիտակ կատարէն,  
Աստղածորան գիշերներու յոյսին հետ,  
Վարէն, ահեղավագ Եփրատին կ'ունկնդրէի...:

Բ

Արցունքո՛վ, արցունքո՛վ լսեցի որ աւերակ առ աւերակ,  
Քու լայնանիստ պատերդ իրարու վրայ կործանեցին,  
Սարսափի օր մը, կոտորածի օր մը, օր մը արիւնի...  
Չքեզ եզերող պարտեզիդ ծաղկրներուն վրայ:

Գ

Ու մոխրացա՛ւ այն սենեակը կապոյտ,  
Որուն որներուն ետեւ եւ գորգերուն վրայ,  
Իմ երջանիկ մանկութիւնս կը հրճուէր,  
Եւ կեանքս կ'աճէր եւ հոգիս իր թեւերը կ'առնէր...

Դ

Փշրեցա՞ր, ուրե՛սն, այն հայելին ոսկեծիր,  
Որուն եթերային խորութեանը մէջ,  
Երագներս, յոյսերս, սէրերս եւ կամքս կարմիր,  
Տարիներով, մտածումիս հետ, ցոլացին...

Ե

Ու բակին մէջ երգող աղբիւրը մեռա՞ր,  
Ու կոտորեցա՞ն պարտեզիս ուռին եւ թթենին.  
Եւ այն առուակը որ ծառերուն մէջէն կը հոսէր,  
Ցամքեցա՞ր, ըսէ՛, ո՞ր է, ցամքեցա՞ր, ցամքեցա՞ր...

Զ

Օ՛, այն վանդակին կ'երագեմ յաճախ,  
Որուն մէջ գորշագոյն կաքաւս, առաւօտուն,  
Արեւածագին հետ եւ վարդի թուփերուն դիմաց,  
Զարթնումի Ժամուս ` յստակօրէն կը կարգճէր...:

Է

Հայրենի՛ տուն, հաւատա՛ որ մահէս յետոյ  
Քու աւերակներուդ սեւին վրայ, իմ հոգիս,  
Պիտի գայ, որպէս տատրակ մը տարագիր,  
Իր դժբախտի երգը եւ արցունքը լալու...:

Ը

Բայց ո՛վ պիտի բերէ, ո՛վ պիտի բերէ, ըսէ՛,  
Քու սրբազան մոխիրէդ ափ մը մոխիր,

Մահուանս օրը, իմ տրտում դագաղիս մէջ,  
Հայրենիքս երգողի իմ աճիւնին խառնելու...:

Թ

Ափ մը մոխի՛ր աճիւնիս հետ, Հայրենի տուն,  
Ափ մը մոխի՛ր քու մոխիրէդ, ո՛վ պիտի բերէ,  
Քու յիշատակէ՛դ, քու ցաւէ՛դ, քու անցեալէ՛դ,  
Ափ մը մոխիր... իմ սրտիս վրան ցանելու...: